

Спортивн кӧдлмш районд

Мана орн-нутгин олна бӕӕдл-джи-ргълд спорт йир ик чинр зӕуӕнӕ. Болв Целинн районд эн ик чинртӕ кӧдлмшт жергтӕ оньг ӧггдхш. Спортивн кӧдлмш районд эврӕ эжлцдӕн бӕӕгъӕ. Районд 1959 джил гурвдгч разрядта 20 спортсменмӕд болн хойрдгч разрядтӕ 2 спортсменмӕд белдгдв. Района футболн команд Элст балгъсна «Динамо» болн Приюгн селӕнӕ футболн командсла эн джилин эргцд зуг хойрх дакдж дӧрлдӕ кецхӕв. Волейбол, баскетбол, бокс болн нань чигн спортивн нег чигн дӧрлдӕн болсн уга. Районд дӧӧвин разрядникӕд оln, болв дӧӧвин турнир хая-хая кегднӕ.

Ӑдгӕ цагт «Западный» совхозд волейболн болн баскетболн секц,

Троицк селӕнд гимнастическ кружок кӧдлджӕнӕ. Района центрт 1960 джил волейболн, баскетболн, боксин болн нань чигн секцс эжлдж кӧдлхмн. Эн секцсиг хойрдгч разрядтӕ спортсменмӕд гардхмн, болв спортивн инвентарь уга. Спортивн инвентарь хулдж авх кегр республиканск спортивн обществсин союзин ӧмн шин джилд тӕвгдджӕнӕ.

Целинн района спортивн обществсин союзин ахлӕч ӕр Манцевой кӧдлмшӕн муугъар кедж йовхиг темдгх кегртӕ.

Спортивн кӧдлмшин чинриг районд ӧӧдлӕллгън — района спортивн обществсин союзин эркн гол тӧр.

О. КЮНКРИКОВ.